

Vitgs attractivs per la giuventetgna

Lumnezia e Val Stussavgia vulan promover projects da giuventetgna

Martin Cabalzar/FMR

Al Forum da giuventetgna dalla Associaziun per las regiuns muntagnardas (SAB) coopereschon actualmein 27 vischnauncas ch'ein distinguidas cul label «Vitgs muntagnards attractivs per la giuventetgna». Denter quellas era las vischnauncas grischunas da Lumnezia e Val Stussavga. Presidiaus vegn il Forum da giuventetgna actulamein era d'ina presidenta sursilvana, numnadamein dalla studenta d'economia *Sarina Caduff* (22) da Cumbel. Sco quei ch'ella sincerescha enviers la FMR paralisescha la crisa da corona era las activitads dalla giuventetgna els vitgs muntagnards. Malgrad che corona hagi impidiu per gronda part las activitads dallas uniuns ch'ein d'eminenta impurtonza per la veta dils vitgs, seigi la giuventetgna da plirs vitgs muntagnards restada activa e realizau differentas activitads ed events el liber, secapescha cun respectar las restricziuns da corona. En differents vitgs hagi la giuventetgna era organisau survetschs da far cumissiuns per glieud attempada duront il temps dil cunfinament general, constatescha Sarina Caduff.

Spazi da habitar e fiera da lavur

Alla sentupada annuala che ha giu liug dacuort a moda virtuala ei il Forum da giuventetgna s'occupaus cullas perspectivas digl avegnir. «Igl ei semussau che cunzun la munconza da spazi da habitar adattau ei savens in problem virulent per ils vitgs muntagnards», resumeschha Sarina Caduff. Ferton ch'ei dat en loghens turistics bunamein mo habitaziuns da luxus fetg caras, datti en auters vitgs cunzun habitaziuns veglias che restan vistas. «Apparentamein dat ei el mument aunc memia pauc investurs (indigens) ch'ein interessai da sanar quellas immobiglias a moda adattada e d'affitar talas», di la studenta d'economia. Savens ei la munconza da spazi d'habitar adattau perquei la raschun che biars giuvenils bandunan lur vitgs. «Impurtontas ein secapescha era las pusseivladads sillla fiera da lavur.» Cheu giavischian ils giuvenils che las schanzas dalla digitalisaziun vegnien nezegiadas pli intensivamein. Ei drovi denton vinavon era ulteriuras stentas dalla politica e dall'economia per etablier posts da lavur attractivs per aschia migliurar las perspectivas dalla giuventetgna ellas regiuns muntagnardas.

Ils commembers dil Forum da giuventetgna ein denton era digl avis che las vischnauncas savessen effectuar bia cun semplas mesiras, constatescha Sarina Caduff. Aschia savessen elllas per exemplu sustener aunc dapli las uniuns che s'occupan d'activitads dil temps liber, cunzun er talas ch'ein attractivas per la giuventetgna. Impurtonta seigi era ina bona communicaziun. Il Forum da giuventetgna vegni a rimnar ideas e propostas e suttametter quellas alla reuniu online dils representants dallas vischnauncas participadas ch'ei previda pils 10 da zercladur.

Projects instradai e sin rucca en Lumnezia e Stussavgia

Dapi l'entschatta fan las duas vischnauncas fusiunadas da Lumnezia e Val Stussavgia part dil Forum da giuventetgna e quei cun representants els gremis directivs. Ord Lumnezia ein

cunzun *Moreno Donato* (Degen), *Sabrina Cabalzar* (Lumbrein), *Sarina Caduff* (Cumbel) e *Seraina Andreoli* (Vignogn) dalla partida. Sco quei che la schefa dil departament da cultura *Elisabeth Lorez* accentuescha enviers la FMR, ha la vischnaunca Lumnezia gronda capientscha pils basegns dils giuvenils ed ha era gia instradau differents projects sin quei sectur. Ella menziunescha en quei connex l'introducziun d'ina canorta da giuvenils el Center da sport e cultura Cuschnaus che s'adressescha primarnein als scolars dallas davosas classas e che vegn uss menada professiunalmein ensemes culla canorta da giuvenils a Glion. El decuors da 2019 ei plinavon vegniu elaborau in studi da realisabladad per ina casa da pliras generaziuns. Sco emprem project vegn realizau el decuors da questa stad ina canorta d'affons pigns, ina meisa da miezdi e la survigilonza dils affons da scola ell'anteriura casa dil miedi a Vella. Pli tard duein purschidas per giuvenils sco era per senioras e seniors vegnir vitier. Purtadas vegnan quellas activitads dalla Uniun Cumbinala Lumnezia che ha ina cunvegna da prestaziun culla vischnaunca che garantescha ina garanzia da deficit per ils emprems tschun onns. Per facilitar la mobilitad dils giuvenils sustegn la vischnaunca era colligiaziuns da bus gratuits per ir cun skis ni en sortida.

En la vischnaunca fusiunada da Val Stussavgia che secumpona dallas fracziuns da Valendau, Versomi, Stussavgia e Tenna ei vegniu installau ina cumissiun da giuventetgna cun *Marco Zinsli* (21) alla testa. Sco animatura da giuventetgna han ins pladiu *Tania Zinsli*. Cul sustegn della vischnaunca ei vegniu realizau in local da giuventetgna accumpaignau a Valendau. Plinavon fuorman las scolaras ed ils scolars dil scalem superieur duas gadas ad onn in «parlament da giuventetgna» che bratta ideas, formulescha propostas per mauns dalla vischnaunca e che vul sensibilisar la giuventetgna per la politica communal. El decuors dils davos onns ein las differentas plazzas da giug vegnidias modernisadas ed ei il bus local «Ruinaulta» ei realisaus. En discussiun ei la realisaziun d'ina halla per events sportivs, in local da party per giuvenils carschi ed in lag da far bogn. «Probabel stuein nus denton priorisar ed etappar ils singuls projects a norma da nossas pusseivladads finanzialas», remarca Zinsli. Dalla vischnaunca hagi ins denton in bien sustegn.